

## ღია მმართველობა საქართველო საჯარო კონსულტაციები 2014

ქალაქ საგარეჯოში ღია მმართველობა საქართველოს საჯარო კონსულტაცია USAID-ის დემოკრატიული ჩართულობის ცენტრში გაიმართა. შეხვედრას ადგილობრივი თვითმმართველობის წარმომადგენლები, ბიბლიოთეკარები, სტუდენტები, არასამთავრობო ორგანიზაციის და ქალთა კლუბის წევრები, ასევე სხვა დაინტერესებული პირები ესწრებოდნენ.

შეხვედრის ფარგლებში სსიპ იუსტიციის სახლის აღმასრულებელი დირექტორის მოადგილემ ირაკლი ლომიძემ და ღია მმართველობა საქართველოს ეროვნულმა კოორდინატორმა ქეთი ცანავამ, შეკრებილ საზოგადოებას გააცნეს მთავრობის ის ინიციატივები, რომელთა მიზანია მთავრობის ღიაობის, გამჭვირვალობისა და მოქალაქეთა წინაშე ანგარიშვალდებულების გაზრდა და რომლებიც დაგეგმილია, რომ ვალდებულებების სახით ჩაიდოს ღია მმართველობა საქართველოს 2014–2015 წლის სამოქმედო გეგმაში.

### შეხვედრის მონაწილეებმა ყურადღება გამახვილეს შემდეგ საკითხებზე:

- შეხვედრის მონაწილეთა მოსაზრებით, საზოგადოებას აქვს ნაკლები ინფორმაცია ქვეყანაში მიმდინარე პროცესების შესახებ, განსაკუთრებით კი სოციალური პროგრამების შესახებ (როგორ შეუძლიათ ჩაერთონ, მიიღონ მონაწილეობა, გამოიყენონ ეს პროგრამა). მათი ხედვით, ამ პრობლემის გადასაჭრელად ყველაზე ეფექტური მეთოდი იქნებოდა სწორედ ღია მმართველობა საქართველოს კონსულტაციების მსგავსი შეხვედრები, ვინაიდან რეგიონების გარკვეულ ნაწილში ინტერნეტი ჯერ კიდევ არ არის ხელმისაწვდომი, რომ მხოლოდ ამ არხით გავრცელდეს სრულყოფილად ესა თუ ის ინფორმაცია თუ სიახლე. შეხვედრის დამსწრეები თვლიან, რომ საზოგადოების ცნობიერების ამაღლება სხვადასხვა მიმართულებით გაზრდის მათი ჩართულობის ხარისხს გადაწყვეტილებების მიღების პროცესში.
- შეხვედრის მონაწილეებმა ასევე ისაუბრეს იმ პრობლემაზე, რაც მათ შექმნიათ საჯარო ინფორმაციის გამოთხოვის დროს: ეს არის საჯარო ინფორმაციის გაცემაზე დადგენილი ვადების დარღვევა ადმინისტრაციული ორგანოს მიერ. ისინი თვლიან, რომ რიგ შემთხვევაში შესაბამის უწყებას მოთხოვნილი ინფორმაციის მოსაპოვებლად/შესაკრებად შესაძლოა მართლაც სჭირდებოდეს კანონმდებლობით განსაზღვრულ ვადაზე მეტი, თუმცა მიიჩნევენ, რომ უნდა არსებობდეს უკუკავშირის ეფექტური სისტემა მოქალაქესა და უწყებას შორის, რათა მათ ეცნობოთ თუ რა დროში მიიღებენ მოთხოვნილ ინფორმაციას. შეხვედრის მონაწილეთა აზრით, ამგვარი უკუკავშირის არარსებობა დღეს ერთ-ერთი ყველაზე მნიშვნელოვანი პრობლემაა. შეხვედრის ფარგლებში დამსწრე

საზოგადოებას მიეწოდა ინფორმაცია საქართველოში ინფორმაციის თავისუფლების სფეროში დაგეგმილი რეფორმის შესახებ, რასაც მათი დადებითი შეფასება მოჰყვა.

- შეხვედრის მონაწილეებმა დადებითად შეაფასეს იუსტიციის სახლის სამომავლო გეგმები, რამდენიმე სერვისის დამატებისა და უკუკავშირის სისტემის შექმნის შესახებ. იუსტიციის სახლთან დაკავშირებით გამოითქვა მოსაზრება, რომ მომხმარებლისთვის სასურველი და უფრო კომფორტული იქნებოდა შეეძლოს მიმართოს ერთსა და იმავე ოპერატორს, ისეთ შემთხვევებში, როდესაც ერთ კონკრეტულ თემაზე მას რამდენიმე ვიზიტი უწევს იუსტიციის სახლში. შეხვედრის მონაწილეებს ასევე დეტალური ინფორმაცია მიეწოდათ საზოგადოებრივი ცენტრებისა და მოქალაქის პორტალის შესახებ. ორივე მათგანმა მათი დიდი მოწონება დაიმსახურა. შეხვედრის რამდენიმე მონაწილეს გაუჩნდა იდეა მოქალაქის პორტალზე რეგისტრაცია შესაძლებელი იყოს არა მხოლოდ იუსტიციის სახლებში, არამედ, მაგალითად, საჯარო რეესტრის ტერიტორიულ ოფისში, ვინაიდან, იუსტიციის სახლი არ არის საქართველოს ყველა ქალაქში.
- შეხვედრის მონაწილეთა განსაკუთრებული ინტერესი გამოიწვია საჯარო სამსახურის რეფორმამ. შეხვედრის მონაწილეები თვლიან, რომ დღეისათვის ვაკანსიათა უმეტესობისთვის მითითებული მოთხოვნები აჭარბებს პოზიციის რეალურ საჭიროებებს. დამსწრეები მიიჩნევენ, რომ მკაცრად უნდა იქნეს დაცული საკონკურსო ვადები, რათა დასაქმების მსურველს არ მოუხდეს გაურკვეველი ვადით მოლოდინი. შეხვედრის მონაწილეები ასევე ფიქრობენ, რომ საჯარო სამსახურში არსებულ ვაკანსიებზე მითითებული ასაკობრივი ზედა ზღვარი უნდა გაიზარდოს.
- აქტიური გამოხმაურება მოჰყვა საკანონმდებლო მაცნეზე არსებული კომენტარების მოდულს. შეხვედრის მონაწილეები თვლიან, რომ საჭიროა, არსებობდეს პასუხისმგებელ პირთა ჯგუფი, რომელიც იმუშავებს კომენტარების ანალიზზე და შესაბამისი უწყებისთვის მიწოდებაზე. შეხვედრაზე დამსწრე ერთ–ერთი სტუდენტის მოსაზრებით ამ მიმართულებითაც საჭიროა საზოგადოების ცნობიერების ამაღლება, რათა მათ იცოდნენ კომენტარების გაკეთების მექანიზმის არსებობის შესახებ და დაინტერესების შემთხვევაში, გამოიყენონ იგი.